

# **AWIG - AWIG DESA ADAT TUSAN**



**DESA TUSAN  
KECAMATAN BANJARANGKAN**



**KABUPATEN KLUNGKUNG  
TAHUN 2002**

အပိကပိက  
၇သက အသဗ္ဗသန  
**AWIG-AWIG  
DESA ADAT TUSAN**

၇သက အသဗ္ဗသန  
နိသဗ္ဗသန  
**DESA ADAT TUSAN  
KECAMATAN BANJARANGKAN**

နသပ၇သန နွံ  
ဟဟန ၁၉၀၀၉  
**KABUPATEN KLUNGKUNG  
TAHUN 2002**

# PIDAGING MAKA BANTANG AWIG-AWIG DESA ADAT TUSAN

|                                              | widang |
|----------------------------------------------|--------|
| Murdacitta .....                             | ii     |
| Pratama Sargah, Aran lan Wawidangan .....    | 1      |
| Dwitya Sargah, Patitis lan Pamikukuh .....   | 2      |
| Tritya Sargah, Sukerta Tata Pakraman .....   | 3      |
| Palet 1 Indik Krama .....                    | 3      |
| Palet 2 Indik Prajuru .....                  | 6      |
| Palet 3 Indik Kulkul .....                   | 8      |
| Palet 4 Indik Paruman lan Sangkepan .....    | 10     |
| Palet 5 Indik Druwen Desa .....              | 11     |
| Palet 6 Indik Sukerta Pamitegep .....        | 13     |
| Kaping 1 Indik Karang, Tegal lan Carik ..... | 13     |
| Kaping 2 Indik Kakayonan .....               | 14     |
| Kaping 3 Indik Wawangunan .....              | 14     |
| Kaping 4 Indik Wawalungan .....              | 15     |
| Kaping 5 Indik Bhaya lan Dusta .....         | 15     |
| Kaping 6 Indik Panyanggran Banjar .....      | 17     |
| Cathurtas Sargah, Sukerta Tata Agama .....   | 18     |
| Palet 1 Indik Dewa Yadnya .....              | 18     |
| Palet 2 Indik Resi Yadnya .....              | 23     |
| Palet 3 Indik Pitra Yadnya .....             | 25     |
| Palet 4 Indik Manusa Yadnya .....            | 30     |
| Palet 5 Indik Bhuta Yadnya .....             | 31     |

|                                                       |           |
|-------------------------------------------------------|-----------|
| <b>Pancama Sargah, Sukerta Tata Pawongan .....</b>    | <b>33</b> |
| Palet 1 Indik Pawiwahan .....                         | 33        |
| Palet 2 Indik Nyapian .....                           | 36        |
| Palet 3 Indik Sentana .....                           | 38        |
| Palet 4 Indik Warisan .....                           | 39        |
| <b>Sadha Sargah, Wicara lan Pamidanda .....</b>       | <b>41</b> |
| Palet 1 Indik Wicara .....                            | 41        |
| Palet 2 Indik Pamidanda .....                         | 42        |
| <b>SaptamaSargah, Nguwah Nguwuhin Awig-awig .....</b> | <b>45</b> |
| <b>Asthama Sargah, Samapta .....</b>                  | <b>46</b> |
| <b>Tim Penyusun Awig-awig Desa Adat Tusan .....</b>   | <b>49</b> |

## **AWIG-AWIG DESA ADAT TUSAN**

**MURDHA-CITTA**

**OM SWASTYASTU, OM AWIGHNAMASTU NAMA SIDDHAM.**

Malaraupan antuk panghyangning Ida Sang Hyang Widhi Wasa, asung kertha wara nugraha ngawentenang kahuripan sekala niskala ring Bhuwana Agung lan Bhuwana Alit. Manut dresta wantah pawakan pasayuban krama desa rauhing kulawarga pawongania. desane kaanggehang Bhuwana Agung, pawongania soang-soang pinaka Bhuwana Alit.

Sotaning Bhuwana Agung desane wantah pawakan Bhuwana maurip jangkep saha Tri Hita Karanania, luwire :

- ha. Parhyangan, sahananing kahyangan, panyiwian desa genah ngarcana Ida Sang Hyang Parama Wisesa maka jiwaan desane.
- na. Pawongan, krama saha warga desa maka sami pawakan bayu pramana. mawinan desane sida malih maprawerti.
- ca. Palemahan, tanah kakuwuban desa sinanggeh stula sariraning desania. adung patemon Bhuwana kalih, larapan santa-jagadhita, sinanggeh murddhaning prayojana pangeriptaning awig-awing desa pakraman ring paseban Krama Desa Adat Tusan. pinaka sepat siku-siku pamutus, wastu prasida prayojanam mami kabeh prasida angidep muwah amagehaken kadi linging awig-awig iki.

### **PRATAMA SARGAH ARAN LAN WAWIDANGAN DESA**

Pawos 1

- (1) Desa Adat puniki mawasta Desa Adat Tusan.
- (2) Jebar kakuwub wawidangania mawates nyatur :
  - ha. Sisih Kangin Desa Adat Sema Agung.

- na. Sisih Kauh Tukad Melangit.
  - ca. Sisih Kaler Desa Bakas.
  - ra. Sisih Kelod Desa Banjarangkan.
- (3) Desa Puniki kawangun antuk karang desa miwah gebogan krama, tur kaepah dados tigang banjar luire :
- ha. Banjar Kangin.
  - na. Banjar Kawan
  - ca. Banjar Kaler

## **DWITYA SARGAH**

### **PATITIS LAN PAMIKUKUH**

#### **Pawos 2**

Desa Adat Tusan ngamanggehang pamikukuh minakadi :

- ha. Pancasila.
- na. Undang-undang Dasar 1945.
- Ca. Tri Hita Karana manut Sada Cara Agama Hindu.

#### **Pawos 3**

luwir patitis Desa Adat Tusan :

- ha. Ngukuhang miwah ngarajegang Agama Hindu.
- na. Nginggilang tata prawertine maagama.
- ca. Ngerajegang kasukertan desa saha pawongannia sekala lan niskala.

**TRITYA SARGAH**  
**SUKERTA TATA PAKRAMAN**

**Palet 1**

**Indik Krama**

Pawos 4

- (1) Sane kabawos warga Desa Adat Tusan inggih punika sapisira ugi sane jumenek ring wawidangan Desa Adat Tusan sane maagama Hindu, satinut ring daging Awig-awig lan pararem Desa Adat Tusan.
- (2) Sane kabawos Krama Desa Adat Tusan inggih punika warga desa sane sampun alaki rabi, ngamong utawi tan ngamong karang desa mwan sareng nyungsung sahananing Kahyangan Desa sane dados amongan Desa Adat Tusan.
- (3) Warga Desa Adat Tusan sane magenah ring dura desa melarapan antuk ngarereh pangupajiwa yan sampun alaki rabi, kangkat tedun makrama desa ring Tusan Mungwing swadharmania, kamanggehang manut pararem.
- (4) Sajaba kadi mungguh ring kecaping (1), (2), lan (3) ring ajeng kasinanggeh tamiu.

Pawos 5

Krama Desa Adat Tusan luwire :

- ha. Krama ngarep jangkep, inggih punika krama sane kantun jangkep alaki rabi tur jumenek magenah ring wawengkon Desa Adat Tusan sangkaning wed lan tanwed.
- na. Krama ngarep Tapukan inggih punika anak-anaking krama sane katinggal lampus olih yayah renania tur ngamong karang desa sadurung mayusa 17 warsa utawi sadurung marabian.
- ca. Krama ngarep Unggu, inggih punika krama sane sampun nyada tan maduwe panyundul utawi penyeledihi, ngamong utawi tan ngamong karang desa sampun mayusa sekirang-kirangnia 70 tiban.
- ra. Krama ngarep Arirang, inggih punika krama sane katinggal lampus olih laki utawi rabinia.

- ka. Krama ngarep Serah Kalah, inggih punika krama desa sane megenah ring dura desa.

#### Pawos 6

Larapan dados krama desa sekadi ring sor :

- ha. Sang mawit saking wawidangan Desa Adat Tusan :
1. Sangkaning ngamong karang desa.
  2. Sangkaning pawiwahan.
- na. Sang mawiwit saking dura desa sane jumenek ring Desa Adat Tusan sangkaning rahayu, kacihnayang antuk sewalapatra saking desania.

#### Pawos 7

Panemaya tedun makrama manut jalarania kamanggehang sekadi ring sor :

- ha. Sangkaning pawiwahan-6 sasih riwus rahina pangambilania.
- na. Sangkaning nyeledihi - ngawit saking sang kaseledihi kamanggehang nyada.
- ca. Sangkaning kaadmara - sasampun sang mapinunas nawur patulakwali manut pararem.
- ra. Sangkaning pecak kanorayang utawi kapenging risampun nunas pangampura ring krama sajeroning paruman tur buntas nawur pamidanda manut pararem.
- ka. Jadma saking dura desa sane maagama Hindu - sasampune jumenek ring Desa Adat Tusan masuwe 3 sasih tur sampun madrebe tanah paumahan tur nawur babuat manut pararem.

#### Pawos 8

Gagwat pamargi panyeledihi utawi panyundul kaanggehang sakadi ring sor :

- ha. Krama Desa sane tan maduwe putra nanging ngamong karang desa, yan sampun panemaya nyada patut ngarereh panyeledihi.
- na. Sane patut manyeledihi utawi nyundul, sentana lanang sane marabian pinih dumun.

#### Pawos 9

(1) Ayah-ayah krama kaanggehang sekadi ring sor :

- ha. Krama ngarep jangkep keni ayah-ayah lan padagingan mamungkul, manut pamargin dresta.
- na. Krama ngarep Tapukan, keni padagingan mamungkul, nanging ayah-ayah manut kawo ngania.
- ca. Krama ngarep Unggu, sane ngamong Karang Desa keni wawedalan nanging luput ayah-ayah.
- ra. Krama ngarep Unggu sane tan ngamong Karang Desa luput wawedalan lan ayah-ayah.
- ka. Krama ngarep arirang, keni wawedalan mamungkul, nanging ayah-ayah manut kawongania.
- da. Krama ngarep Serah Kalah, keni wawedalan mamungkul nanging luput ayah-ayah, tan polih panglungsur.

- (2) Warga sane kamanggehang pinaka tapukan sareng yayah utawi renania yan sampun mayusa 17 warsa patut keni ayah-ayah manut kawongania.
- (3) Panyada yan malih ngambil rabi patut mawali malih tedun makrama mawaneng 6 sasih saking pangambilannia.
- (4) Jadma saking dura desa yan sampun jumenek ring Desa Adat Tusan risampun kasadokang olih sang nampi, patut katureksa olih Prajuru, selantur ipun katiwakin pamutus manut pararem.

#### Pawos 10

Krama Desa Adat kadadosang mapuangkid rikala :

- ha. Sungkan rahat.
- na. Maduwe kulawarga seda utawi kalayusekaran.
- ca. Matepetin kulawarga sungkan rahat.
- ra. Polih laluputan manut kawongania.

#### Pawos 11

- (1) Krama Desa sane nampi tamiu jatos marerepan patut matur supeksa ring prajuru desa tan kasepan arahina.

- (2) Swadharmaning tamyu sakadi ring sor :
- ha. Patut ninutin sapa margin kasukertaning desa.
  - na. Patut sida ngaturang dana punia ring Desa Adat prade jumenek jantos sasihan manut pararem.
- (3) Tamiu sane satinut kecap ring ajeng wenang polih pangayoman saking desa pamekas marupa pitulung rikala katiben pancabaya.

#### Pawos 12

- (1) Wusan dados Krama Desa Adat, luire :
- ha. Sangkaning lampus.
  - na. Sangkaning pinunas ngaraga dwaning kesah ke dura desa.
  - ca. Kadaut pipilnia sajeroning paruman dwaning kasinanggeh banget iwangnia.
- (2) Sang wusan makrama nenten polih pahpahan druwen desa adat.
- (3) Sang wusan makrama sangkaning kanorayang tan kadadosang nganggen sakancan druwen desa tur tan kangkat kakuwubang olih krama siosan nanging yan ipun lampus kulawargania kangkat wantah ngeseng manut uger-uger desa lan pararem.

#### Pawos 13

- (1) Warga desa sane sampun yowana utawi munggah deha truna patut tedun maseka truna ring babanjaran swang-swang.
- (2) Swadharmaning sekaa truna ngamargiang ayah roban utawi ayah truna manut wigunania.

#### Palet 2

#### **Indik Prajuru**

#### Pawos 14

- (1) Sane kasinanggeh prajuru desa adat inggih punika :

ha. Bendesa Adat.

na. Panyarikan. →

ca. Patengen. →

ra. Kelihan Banjar.

ka. Kelihan pura.

(2) Desa Adat Tusan kaenter olih Bendesa Adat, taler kawantu :

ha. Panyarikan pinaka juru surat. —

na. Patengen pinaka juru raksa druwen desa adat. —

ca. Para Kelihan Banjar lan Kelihan pura pinaka wakilnia ring swang-swang Banjar.

(3) Bendesa Adat mwang Prajuru siosan patut mawiwit saking krama ngarep wed tur kaadegang malarapan antuk sasudian sajeroning paruman desa, swang-swang mawaneng 5 warsa, nanging dados kasudi malih apisan.

(4) Rikala ngadegang Bendesa Adat muang prajuru siosan patut kadulurin upasaksi utawi atur piuning ring Pura Dalem Kayu Putih kasaksinin olih Krama Desa.

(5) Kelihan Banjar lan Kelihan Pura kasudi antuk Banjar swang-swang.

#### Pawos 15

Sajeroning midabdabin kasukertan niskala, yadnya ring Kahyangan Desa utawi ngupakara kasucian Kahyangan Desa lan sahanania, kaenter antuk Bandesa Adat lan Prajuru Desa tur katuntun antuk Ida Sulinggih utawi Ida Padanda mwang para Pamangku Desa.

#### Pawos 16

Swadarmaning Bandesa Adat, luire :

ha. Ngamargiang sadaging awig-awig miwah pararem desa.

na. Nuntun tur ngenterang krama rawuhing warga desa manut sakadi patitis.

ca. Mawosin kalih niwakang pamutus marep ring wicara warga desa sane kasadokang ring prajuru.

ra. Maka dutan desa matemuang bawos ring sapasira ugi manut dresta.

ka. Midabdabin sahanan druwen desa.

Pawos 17

Patias utawi olih-olihan prajuru desa, luire :

- ha. Luput peson-peson.
- na. Polih banten pasaksi.
- ca. Upon pecatu utawi pelaba, tegal druwen desa manut pararem.
- ra. Patias tiosan manut pararem.

Pawos 18

(1) Prajuru Desa kagentosin santukan :

- ha. Seda.
- na. Sampun tutug waneng 5 (limang) warsa.
- ca. Kararianang dwaning iwang pemargi sangkaning nilar sasananing prajuru manut pararem.
- ra. Wit saking pakahyun utawi pinunasnia ngaraga.

(2) Nganorayang ngusanang miwah ngentosin prajuru patut sajeroning paruman tur kaingkupin olih Krama Desa utawi Krama Banjar sekirang-kirangnia apahan lintang siki.

Palet 3

**Indik Kulkul**

Pawos 19

Kulkul ring Desa, luire :

- ha. Kulkul Desa.
- na. Kulkul Banjar.
- ca. Kulkul Pura.
- ra. Kulkul Pacalang

- ka. Kulkul Dadia.
- da. Kulkul Sekaa-sekaa.
- ta. Kulkul Paumahan utawi Pondokan.

#### Pawos 20

Tabuh tatepakan kulkul kamanggehang kadi ring sor :

- ha. Kalih tuludan cihna patedunan krama pacang sangkep, parum, mwang patedunan  
lian manut wawidangan kulkul inucap.
- na. Atuludan Bulus salanturnia ngempang cihna kapancabaya.
- ca. Atuludan alon cihna wenten kalayusekaran ring wawidangan banjar genah kulkul  
inucap.
- ra. Tigang tepakan alon rikala wengi-cihna wenten warga ngerorod utawi mrangkat.
- ka. Petang tepakan alon cihna ngawit utawi ngalebar brata penyepian.
- da. Ngumpang nyangsih cihna pamargin wali utawi Dewa Yadnya.

#### Pawos 21

- (1) Kulkul Desa Banjar, Pura mwang sekaa-sekaa sane wenten ring wawengkon Desa  
Adat Tusan tan dados katepak yan tan sangkaning pituduh saking prajurunia soang-  
soang sajawaning rikala wenten kapancabaya.
- (2) Sapasira ugi nepak kulkul Desa Utawi Banjar, rikala wenten kapancabayan patut  
nyantos ring genah kulkul inucap jantos wenten prajuru utawi krama rauh netesang  
tatujaon panepak sanistania 3 diri.
- (3) Kulkul sekaa-sekaa minakadi paumahan tan kalugra matehin sukat kulkul desa  
mwang kulkul banjar.
- (4) Sang mamurug kecap ring ajeng wenang katiwakin pamidanda manut pararem.

Palet 4

**Indik Paruman lan Sangkepan**

Pawos 22

- (1) Sangkepan krama desa kamargiang ngasasih nemonin rahina Bhuda Kliwon.
- (2) Sangkepan banjar mwang sekaa-sekaa kamargiang manut drestania soang-soang.
- (3) Paruman ring wawengkon Desa Adat Tusan luire :
  - ha. Paruman Krama Desa.
  - ca. Paruman Prajuru Desa.
  - ra. Paruman Krama Banjar.Paruman-paruman inucap kamargiang padgatakala manut kabuatan.
- (4) Tata Trepti Paruman wiadin sangkepan sakadi ring sor :
  - ha. Krama sane pacang nyarengin sangkepan utawi paruman patut nganggen busana adat madya.
  - na. Tan kalugra makta salwiring gagawan mwang barang-barang sane tan wenten paiketan ipun ring pamargin sangkepan utawi paruman.
  - ca. Tan kalugra ngawetuang bebawos gora, bangras, sigug lan sapanunggalania, sane ngawinang rebat.
  - ra. Tan kadadosang masuksukan utawi ngawakilang sejabaning wenten kapiambeng nanging tan dados ngusul utawi nyelang jinah.
  - ka. Pamargin paruman patut kaabih olih pacalang.
- (5) Pamutus babawosan sajeroning paruman kautamayang mangda ingkup gilik saguluk.
- (6) Sang mamurug kecap ring ajeng wenang katiwakin pamidanda manut pararem.

Pawos 23

- (1) Sajeroning paruman desa, Bandesa Adat patut nambyakan pamargin ngenterang desa pamekas nganinin indik :
  - ha. Munjuk lungsurin krama, ayah-ayah mwang arta berana druwen desa adat.

na. Pikamkam utawi pidabdab prajuru nganinin usaha Desa kapungkur.

- (2) Pamutus paruman desa kasinanggeh pararem maka pamitegep pamargin awig-awig.

#### Pawos 24

- (1) Paruman prajuru desa ngawedarang rarincikan usaha desa kapungkur.
- (2) Paruman prajuru tan dados ngamedalang tategenan ring krama sadurung kaingkupin antuk krama desa sajeroning paruman desa.
- (3) Paruman prajuru kawenangang ngamedalang pasuara nganinin pamargin piteket saking Guru Wisesa.

#### Palet 5

### Indik Druwen Desa

#### Pawos 25

- (1) Padruwen Desa Adat Tusan, sekadi ring sor :

ha. Kahyangan Desa, luire :

1. Pura Dalem Kayu Putih rawuhing tegak lan wawidangania malinggah 16,40 are.

Kahyangan Desa seosan, luire :

2. Pura Batur : 12,15 are rawuhing tegak lan wawidangan tanah tegaknia.
3. Pura Ketekan Aji : 20,40 are rawuhing tegak lan wawidangan tanah tegaknia.
4. Pura Melanting : 3,85 are rawuhing tegak lan wawidangan tanah tegaknia.
5. Pura Dalem Anggar : 11,00 are rawuhing tegak lan wawidangan tanah tegaknia.
6. Pura Dalem Kelod : 8,000 are rawuhing tegak lan wawidangan tanah tegaknia.

na Pasar Desa Adat Tusan

- ca. Tanah Tegalan manut ilikita
- ra. Tanah pakarangan Desa (PKD) manut cacakan.
- ka. Setra
- da. Pelaba Pura, carik makweh ipun 556,76 are.
- ta. Lelanguan minakadi tatabuhan lan ilen-ilen padruwen desa luire :
  - 1. Gong Desa Adat Tusan 1 barung.
  - 2. Gong barong 1 barung.
- sa. Lembaga Perkreditan Desa (LPD) Tusan.
- wa. Balai Desa 1 bungkul, mwah tegaknia.
- la. Arta brana utawi piranti-piranti siosan sane mungguh ring ilikita.
- (2) Olih-olihan Desa Adat Tusan luire :
  - ha. Olih-olihan saking pelaba pura.
  - na. Urunan krama Desa Adat Tusan.
  - ca. Olih-olihan saking LPD.
  - ra. Olih-olihan saking Pasar.
  - ka. Dana Punia tiosan sane patut.

#### Pawos 26

- (1) Prajuru Desa patut ngoregang pamupon laba pura lan druwen desa.
- (2) Pikolih lan pamuponia patut kaanggen prebeya pengayum wawangunan ring pura miwah anggen kabuatan desa adat sane siosan manut pararem.
- (3) Prajuru pangemong druwen desa patut ngawedaran utawi nambyakan sahananing druwen desa parindikan munjuk lungsuring padruwen desa sajeroning sangkepan.
- (4) Sakaluiring druwen desa patut wenten ilikitania.
- (5) Tan kalugra ngadol utawi ngesahang padruwen desa utawi raja duwe yan tan kasungkemin antuk paruman desa.

Palet 6

**Indik Sukerta Pamitegep**

Kaping 1

**Indik Karang, Tegal lan Carik**

Pawos 27

- (1) Krama Desa pangemong karang desa patut ngawatesin karang inucap sanistane antuk pagehan utawi tembok mangda pakantenania asri.
- (2) Wates sisi kaler miwah kangin patut kakaryanin antuk sang ngamong karang ayahan inucap sane mawasta gagaleng kaluan. sejawaning tanah pecatu, tegal carik utawi tanah padruwen ngaraga, sane kapiara wates sisi klod miwah kauh, reh punika mawasta gagaleng kateben.
- (3) Prade karasayang pagehan inucap ngalikadin, yan pada arsa penyandinge, kengin watese nganggen pinget kewanten kasaksi antuk prajuru desa utawi prasihna saking guru wisesa.
- (4) Prade wenten karang kabebeng patut kautsahayang mangda wenten marginia.
- (5) Prade karang desa kaepah patut soang-soang sane ngenahin tedun makrama desa ngarep.
- (6) Tan kapatutang ngadol tanah pekarangan desa lan tanah ayah desa.

Pawos 28

- (1) Sapasira ugi tan kalugra :
  - ha. Ngalahlah margi, tegal, carik ayahan desa lan karang desa.
  - na. Ngalahlah tanah tegak Kahyangan, Setra lan sakancan tanah tegak sane kasinanggeh suci.
- (2) Prade wenten mamurug kadi kecap ring ajeng patut ngawaliang tanah inucap saha keni pamidanda manut pararem, kadulurin upakara ring pamrayascita utawi pamayuh ring tanah genah inucap.

Kaping 2  
**Indik Kakayonan**

Pawos 29

- (1) Sapisira ugi pacang ngawit nandur tanem tuwuh sane pacang dados mageng ring sajroning pakarangan patut ngawilang paembang tatanduran inucap mangda tan kirang ring adepa agung saking tembok wates pakarangan inucap.
- (2) Prade wenten tatanduran utawi kakayonan ngungkulin utawi karasayang pacang mayanin kapisaga, wenang kawara olih sang rumasa pacang kabhayanin mangda kakayonan punika karebah utawi katebtebin.
- (3) Prade sampun kewara taler tan wenten usaha sang nruwenang wit taru nganutin daging pangawarahnian sang rumasa katetehan utawi kajerihan wenang mesadok ring prajuru, tur risampun kaparitas kalugra ngicalang wit taru inucap.
- (4) Sang keni pamidanda panyangaskara saha prebeya manut pararem marep ring wawangunan sang karubuhin lüire :
  - ha. Sang nruwenang wit sinanggeh mayanin, prade pungkut ngarubuhin wawangunan krama tios.
  - na. Sang notor, munggul utawi ngarebah taru tur ngarubuhin wawangunan krama tios.
- (5) Krama Desa patut ngamanggehang kawerdian tanem tuwuh sane ngawinang desa asri tur lestari.

Kaping 3  
**Indik Wawangunan**

Pawos 30

- (1) Rikala pacang ngawangun patut :
  - ha. Masadok ring prajuru pamekas prade wawangunan inucap nganinin wates.
  - na. Kaaptiang nganggen Asta Bumi miwah gagulak kosala-kosali sanistania manut patitis niskala.

- ca. Tan nyayubin utawi nyapcap kapisaga.  
ra. Tan kadadosan ngembahang toya kapisaga, kamargi, utawi karurunge.
- (2) Prade wawangunan jantos ngayubin bilih-bilih tembok ipun ring telenging wates, risampun kaware tur kasadokang ring prajuru, wenang sang madruwe kadanda manut pararem, saha tembok inucap kagubar sanistania mangda kakaryanang abangan.

#### Kaping 4

#### Indik Wawalungan

##### Pawos 31

- (1). Sahanan warga desa sane mamiara wewalungan upami : bawi risampun mabelas utawi banteng risampun antes masaluk tali, patut sayaga nitenin negul, ngelogor mangda tan ngarusakin karang utawi pabianan krama sewos bilih-bilih jantos ngaranjing ngaletihin Kahyangan.
- (2). Prade wenten wawalungan malumbar utawi ngeleb ngarusakin karang utawi pabianan krama sewos, ri sampun kewara kengin kataban tur kadanda saha naur panebas manut pararem.
- (3). Prade jantos ngaletihin tegak suci minakadi pamerajan utawi sanggah lan selantur ipun risampun kaparitatas olih prajuru wenang sang nruwenang kadanda manut pararem.
- (4). Krama Desa patut nitenin wawalungan miwah sarwa prani, tan kapatutan maboros paksi miwah nuba ulam lan sapanunggalania.

#### Kaping 5

#### Indik Bhaya lan Dusta

##### Pawos 32

- (1). Sane kasinanggeh bhaya luire : jiwa bhaya, gni bhaya, toya bhaya, artha bhaya, ripu bhaya, bhayu-bhaya, lindu bhaya mwang dura cara ring agama

- (2). Sapasira ugi manggihin kawentenan baya ring wawengkon Desa Adat Tusan, patut gelis nepak kulkul manut Pawos 20 aksara na Pawos 21 kaping 2
- (3). Tatiwak pamidanda utawi-pamargi salantur ipun majeng ring sang melaksana sane kawetuang bhaya inucap, kamanggehang manut pararem.
- (4). Pangaci ring desa prade wenten bhaya sane kabawos ngaletihin, kamargiang manut kecap sastra agama saha kadasarin antuk pararem.

#### Pawos 33

- (1). Sahananing pratingkah mapailon ring dusta, kabawos ngubkubin corah. Prade sang asapunika wenten nyadokang ring prajuru, patut keni pamidanda pateh ring pamidanda sang melaksana corah sane kakubkubin. Prade jantos ping tiga asapunika, patut katuran ring Guru Wisesa.
- (2). Sapa sira ugi ngarereh raramon makadi ron busung, lan sapanunggilan nia ring tegal warga siosan tan pasadok ring sang madrebe, prade wenten nyadokang ring prajuru wenang kadanda manut pararem.
- (3). Sapasira ugi ngaranjing kapakarangan utawi kapekubon warga siosan rikala suwung yan tan makaukan, utawi masadok ring panyanding karang prade sang madue umah suwung punika kicalan, kangkat sang ngaranjing punika kasumangsayain pinaka dusta.
- (4). Prade sang kasumangsayain inucap ring ajeng kukuh tan ngangken mamandung, kangkat katunasang pamatut ring Guru Wisesa, utawi katiwakin padewa saksi sangkaning pinunas sang kicalan.

#### Pawos 34

- (1). Prade ring Pura wenten kaicalan, yan sane ical, druwen Pura sane kasinanggeh suci, prajuru, para panangku patut digelis nyadokang kaicalan punika ring Bendesa Adat, mwanng Kepala Desa lan salanturnyane ring Guru Wisesa.
- (2). Yan prade sang mamandung tan kaciriyang, prajuru adat wenang ngawentenang sirat pangerata ring krama sami malarapan pamargi sakadi ring sor :  
ha. Prajuru mwah krama sami nangkil ke pura ngeningang raga muang kayun.

- na. Yan prade sinalih tunggil krama utawi prajuru tan rawuh tur tan pasadok ring prajuru, krama utawi prajuru inucap patut keni panyanut manut pamutus, maduluran sirat pangerata.
- ca. Yan wenten pasadok, krama inucap taler keni sirat pangerata.
- ra. Yan druwen pura sane ical pangargania alit umpami pengangge lan sane siosan sang mamandung patut ngentosin druwe sane kapandung, keni pamidanda pamrayascita tur pamidanda manut pamutus pararem.
- (3) Yan sane mamandung kaciriyang tur druwen pura sane ical kasinanggeh suci, patut sang mamandung ngawaliang druwen pura inucap saha naur pamidanda muang pamrayascita maduluran upacara pangenteg linggih.
- (4) Yening sang mandung nenten sumanggup nganutin pidabdab sane sampun kasurat ring ajeng prajuru desa digelis ngaturang ring Paruman Desa.
- (5) Yan arta berana sane ical ring pura druwen pamangu, prajuru, miwah krama, sang kaciryan patut ngawaliang tur keni pamarayascita ring pura inucap.

#### Kaping 6

### Indik Panyanggran Banjar

#### Pawos 35

Krama Desa rikala ngawentenang karya suka duka, patut kasanggra antuk banjar, manut pararem.

**CATHURTAS SARGAH**  
**SUKERTA TATA AGAMA**

**Palet 1**

**Indik Dewa Yadnya**

Pawos 36

- (1). Pura Amongan Desa Adat Tusan, luire :
  - ha. Kahyangan Tiga (Dalem, Puseh Bale Agung).
  - na. Kahyangan Desa tiosan luire :
    - 1. Pura Batur.
    - 2. Pura Ketakan Aji.
    - 3. Pura Dalem Anggar.
    - 4. Pura Dalem Kelod.
    - 5. Pura Melanting.
- (2) Wali ring pura-pura inucap sakadi ring sor :
  - ha. Pura Dalem Kayu Putih rikala Saniscara Kliwon wuku Wayang.
  - na. Pura Dalem Kelod utawi Lungatad rikala Saniscara Kliwon wuku Wayang.
  - ca. Pura Dalem Anggar rikala Anggara Kliwon wuku Medangsia
  - ra. Pura Batur rikala Sukra Paing wuku Dunggulan.
  - ka. Pura Ketakan Aji rikala Saniscara Kliwon wuku Kuningan.
  - da. Pura Melanting rikala Budha Wage wuku Klawu.
- (3) Aci-aci siosan kamargiang sekadi ring sor :
  - ha. Nangluk Merana rikala purnamaning keenem, magenah ring Pura Dalem Kayu Putih.
  - na. Ngaluhur ring Pura Dalem Kayu Putih, nemonin Buda Kliwon Pahang.
  - ca. Ngaturang pawiletan rikala pujawali ring pura Puseh Sari, lan Pura Bale Agung nemonin Anggara Kliwon Medangsia.

- (4) Pangaci ring Kahyangan Desa inucap kamargiang selag dara, ageng kalawan alit, tur kasanggra sapuputa olih pangemongnia soang-soang.
- (5) Rikala wali alit ring kahyangan desa inucap kangkat kapuput olih pamangku, nanging rikala wali ageng kamustiang mangda kapuput olih Ida Sulinggih utawi Ida Padanda.

#### Pawos 37

Palinggih panyiwian sane tiosan sane wenten ring wawidangan Desa Adat Tusan tur kaempon lan kaaci antuk pangemongnia suang-suang luire :

- ha. Pura Subak
- na. Pura Dadia
- ca. Pura Paibon

#### Pawos 38

- (1). Ring soang-soang Pura Kahyangan Desa patut ngadegang Pamangku.
- (2) Wiwitan Sang dados pamangku manut dudonan :
  - ha. Saking keturunan.
  - na. Yan tan wenten saking katurunan wenang nyanjan utawi nunas bawos ring Pura inucap.
  - ca. Malarapan antuk kasudian utawi kasungkemin olih Krama Desa Adat manut dresta.
- (3) Pawintenan kapuputang olih Ida Sulinggih utawi Ida Padanda.
- (4) Wus pawintenan wenang ngarangsuk gagelaran pamangku tur patut kapinggihan olih desa.
- (5) Sane tan kapatutang dados pamangku luire :
  - ha. Sang Cedangga utawi sungkan tahunan.
  - na. Sang amumpang paraning laku.
  - ca. Sang tan kasungkemin olih paruman desa.

#### Pawos 39

- (1). Swadarmaning Pamangku, luire :

- ha. Asewaka Dharma, Astiti Bhakti ring Bhatara sasuhunan pamekas ring Ida Sang Hyang Widhi Wasa.
  - na. Ngenterang sahanan upakara utawi upacara ritatkala patirtan utawi yadnya siosan ring Pura.
  - ca. Ngalaksanayang sahanan sane mabuat suci ring Pura, kaping ajeng rikalaning nedunang utawi ngunggahang pralinggan Ida Bhatara.
  - ra. Ngaturang perahinan, ngangken rahina Purnama, Tilem, Kajeng kliwon miwah sane siosan.
  - ka. Pamangku Desa wenang nyiratang Tirta ring Krama Desa.
  - da. Nuntun Krama Desa mangda stata astiti bhakti ring Ida Sang Hyang Widhi Wasa, tur malaksana susila manut agama.
- (2). Para Pamangku Desa sane katiben wicara, tan kapatutang muputang upacara.
- (3) Pamangku Desa tan kadadosang muput upacara krama utawi warga desa sane kantun dados bantang wicara.
- (4) Yening wenten pamangku keni wicara, punika patut maprayascita raga kasaksiang antuk prajuru Desa Adat.
- (5) Patias utawi olih-olihan Pamangku :
- ha. Luput peson-peson ayahan muwah padagingan.
  - na. Upon palaba carik miwah tegal manut pararem.
  - ca. Kaupakara olih Desa, Indik pawintenan ngawit dados pamangku rauhing Pitra Yadnyania riwekas.
  - ra. Polih busana arangsukan nyabran 2 warsa.
  - ka. Papalihan dana punia utawi sarin canang manut kadi pawilangan ring sor :
    - 1. Sahanan sarin canang rikanjekan wali ring Pura Dalem Kayu Putih, Pura Batur, Pura Melanting kaepah sekadi ring sor :
      - ha. Satenga katur ring Mangku Pangemong.
      - na. Apah empatan katur ring Mangku Pangeromba.
      - ca. Apah empatan katur ring Prajuru Desa utawi Banjar

2. Sahanan sarin canang rikanjekan yadnya napkala gata mekadi manut pituduh saking parisada utawi guru wisesa, pelebon masa, nangluk lan Bhuda Kliwon Pahang ring Pura Dalem Kayu Putih sesari inucap kaepah manut sekadi ring aksara ka kaping 1 (siki)
3. Dana punia kasukserahang sajangkep ipun ke desa adat, kautamayang maangge ring Pura genah sang ngaturang dana punia.
4. Prajuru Desa sareng Krama Desa patut ngalimbakang pedana punia rikanjekan wenten wawangunan ring Pura Kahyangan Desa.

#### Pawos 40

- (1). Ritatkala patirtan ring Pura Desa, pamangku kapatutang :
  - ha. Pinaka Pangenter pangarep ring pura.
  - na. Polih pangeremba saking pamangku-pamangku Desa sane tiosan
  - ca. Yan prade pamangku sane marep kapialang patut pamangku desa sane siosan ngalaksanayang upacara ring Pura manut pituduh prajuru utawi kangkat nuur Ida Sulinggih utawi Ida Padanda.
  - ra. Yan pamangku risampun ngawit ngayah ring Pura, kancit wenten kulawargania lampus, pamangku inucap tan keneng cuntaka sakewanten pamangku tan budal sasowen nyejer.
- (2) Yan wenten pamangku keni ujar ala, ulah ala, pamangku inucap patut kaprayascita manut agama tur sang nguwehin ujar ala keni pamidanda manut pararem.
- (3) Yan wenten krama banjar, desa sane nemah misuh prajuru adat utawi pamangku sang nemah misuh kapatutang mrayascita ke Pura Dalem Kayu Putih kadulurin upacara saha kapuput Ida Sulinggih utawi Ida Padanda tur kesaksiang antuk prajuru sami.
- (4) Yan wenten pamangku kabuktiang amungpang paraning laku, pamangku inucap tan wenang kasepuh tur patut kagentosin.

Pawos 41

Pamangku kagentosin riantukan :

- ha. Seda.
- na. Pinunas ngeraga, duwaning kageringan lan sapanunggalania.
- ca. Yusan pamangku dahating lingsir.
- ra. Kawusanang antuk krama dwaning malaksana sane tan patut utawi amung pang paraning laku.

Pawos 42

Kasukertan Kahyangan ring Desa :

(1) Sane nenten kalugra ngaranjing ka Pura luire :

- ha. Sang katiben cuntaka, sajawaning sulinggih lan pamangku.
- na. Sebel ngeraga.
  - 1. Sebel kandel; ngeraja sewala, selami durung mabersih.
  - 2. Sebel ngembasang putra utawi karuron, sajeroning 42, rahina.
  - 3. Sebel pangantenan, sadurung mabyakala.
- ca. Sang Panten miwah anak babinjat sadurung maupakara.
- ra. Makta sahananing sane kasinanggeh ngaletihin manut agama.
- ka. Wawalungan suku pat, sajawaning kaanggen yadnya.
- da. Mabusana sane tan manut kadi tata caraning ngeranjing ke Pura utawi utama mandala.
- ta. Anak alit sadurung mayusa enem sasih sadurung mapintonan tur kasaksiang antuk prajuru.
- sa. Wong edan utawi buduh.

(2) Tios ring sekadi kecap ring ajeng sadereng polih wak-wakan saking prajuru tan dados ngeranjing ke Pura.

(3) Sang Ngelungsur pawintenan ring Pura Desa patut mabyakala ring Puri utawi Jro suang-suang, tan kawenangang mabyakala ring Pura.

- (4) Parilaksana tan kawenangan ring Pura Luire : mehias, mabanyu, ngagah busana utawi mecikang busana, sajawaning pamangku, makoratan, sirep lanang istri sinarengan, mebawos gora.
- (5) Sang mamurug kadi kecaping ring ajeng patut keni pamidanda manut pararem.

#### Pawos 43

- (1). Yan wenten jadma kerauhan ring Pura, prade kasumangsayanin kengin kapintonin olih Pemangku. Yan tan wyakti jadma inucap karauhan keni danda lan pamrayascita pura manut pararem.
- (2) Yan wenten jadma buduh ngusak-asik parahyangan wenang warisnia kesandangin pemrayascita parahyangan punika.
- (3) Yan jadma buduh saking dura desa ngusak ngasik parahyangan desa wenang desa ngupakara pamrayascita.

#### Palet 2

#### Indik Rsi Yadnya

#### Pawos 44

- (1). Sang pacang madwijati patut mangda :
  - ha. Masadok ring prajuru desa, Prajuru Desa patut nitenin wyadin nureksain mungging parilaksanaan sang pacang madwijati manut sasana mwan sastragama.
  - na. Polih panugrahan saking Parisadha mwan Guru wisesa ri sampune katureksa saparindik dasar-dasar sang pacang madwijati.
- (2) Yan sampun manut ring daging kecap (1) ring ajeng prajuru wenang nyaksinin pamargin upacara padwijatian inucap. Nanging yan lempas ring daging kecap (1) kocap ring ajeng, prajuru wenang tan nyaksinin pamargi punika.
- (3) Risampune puput upacarania tur Naben Ida sampun mapaica parab, prajuru patut ngawedar Indik parab lan pamargin Ida Sang sampunputus madwijati.

- (4) Prade riwekas wenten sulinggih sane tan manut napimalih nyasar laku, madasar antuk Tri Pramana ; bukti, ilikita, saksi, Ida Sang Sulinggih sane malaksana, patut katunasang pamutus ring Nabeh Ida utawi ring sang patut maweh mangda kaicen pamutus.

#### Pawos 45

- (1). Ida Sang putus sane kaadegang Siwa "Guru Loka Pala Sraya" antuk Desa, kapatutang kadi ring sor :
- ha. Pinaka panuntun krama desa Indik tata lan agama.  
na. Muputang upacara ring Kahyangan utawi ring desa.
- (2) Tan kapatutang mapaica pamuput Yadnya sane kantun sajeroning wicara.
- (3) Luput ayah-ayahan, peson-peson utawi paturunan ritatkala wenten Yadnya utawi wawangunan ring Desa.
- (4) Katuran panyanggra rayunan nyabran 6 sasih marupa beras akehnia manut pararem.

#### Pawos 46

- (1). Prajuru patut nuntun krama desa mingsinggihang utawi mikukuhin kesucian sasanan para wiku, Pamangku ring sasana sane manut linggih Ida.
- (2) Krama desa patut ngaturang bojana lan punia ring Ida Sulinggih utawi Ida Padanda ritatkala muputang yadnyania.
- (3) Krama Desa patut teleb nunas panuntun ring Ida Sulinggih utawi Ida Padanda miwah sang sujana. sane prasida mawasana katreptian desa, manut kecaping agama.
- (4) Krama desa katuntun olih prajuru, wenang ninutin sapamargin Sang Muput Yadnya, mangda sahananing yadnya punika tan lempas ring kecaping agama, lan sukertan desa.

Palet 3  
Indik Pitra Yadnya

Pawos 47

- (1). Sahananing upakara pamrateka jadma lampus, kabawos Pitra Yadnya, minakadi :
  - ha. Mresihin sawa.
  - na. Mendem sawa.
  - ca. Ngeseng sawa utawi atiwa-tiwa.
- (2) Mendem Sawa gaguatne sakadi ring sor :
  - ha. Genah mendem utawi ngeseng sawa patut ring Setra ugi sajaba sang maraga sulinggih.
  - na. Mendem sawa utawi atiwa-tiwa tan kalugraha rikala pasah lan dewasa kekeran Desa Adat sane kamanggehang antuk pararem.
  - ca. Pamargin mendem utawi atiwa-tiwa madasar wak-wakan prajuru Desa patut nuur panugrahan Ida Sulinggih utawi Ida Padanda.
  - ra. Tan dados nyekeh sawa langkungan ring asasih sajawaning Pamangku lan Sulinggih utawi Padanda.
  - ka. Yan wenten krama desa lampus nemonin pangambilan wali utawi karya ring kayangan Desa, tan kadadosan mreteka sawa utawi malebonan ngawit saking rahina nyuci ring kahyangan inucap nyantos rahina panyineban.
  - da. Yan prade sang kalampusan kawentenania kobet, kalugra mendem tan pasadok, pamargine makingsan sasiliban utawi asurupan surya tan patengeran swaran kulkul.
  - ta. Sang mamurug kecap ring ajeng keni pamidanda manut pararem.

Pawos 48

- (1). Yan wenten anak istri mobot lampus, kasulubang sasampune bobotania embas utawi kaembasang, Sesampune 42 rahina wawu kaupakarain.

- (2) Yen Prade wenten jadma lampus ring carik utawi tegal, sang madwe kapatutan utawi warisnia patut mamerascita lan pacaruan eka sata ring genah inucap sadurung asasih pitungrahina.
- (3) Yan jadma lampus inucap ring ajeng tan keni antuk ngelingin, wenang katur ring Guru Wisesa, mungguing upakara upacara ring genah inucap kalaksanayang olih Desa Adat utawi Subak sane ngawidangin.
- (4) Yan wenten anak alit sane durung akupak lampus patut kapendem utawi kageseng premangkin kadulurin upakara tur masadok ring prajuru.

#### Pawos 49

Jadma wed saking Desa Tusan sane Jumenek ring dura Desa tur tan makrama ring Desa Tusan prade kalampusan pamarginia kamangehang sakadi ring sor :

- (1) Kadadosang mendem utawi malebonan ring wawengkon Desa Adat Tusan yening wenten sinalih tunggil krama desa sane nguubang.
- (2) Kakeninin pananjung batu manut pararem.
- (3) Tan polih panyanggran krama banjar.

#### Pawos 50

Swadarmaning krama desa prade wenten sinalih tunggil krama ke layu sekaran sekadi ring sor :

1. Sang kaduhkitan patut :
  - ha. Nyadokang ring prajuru desa tur nunas tetimbang Indik pamargi manut kawentenania
  - na. Ngaturin krama desa utawi banjar ngaromba makarya eteh-ete kalayu sekaran manut kawentenania.
  - ca. Manyambrama krama antuk sasida-sidan.
2. Swadarmaning Desa utawi Banjar :
  - ha. Prajuru Desa maritatas pemargin sang kaduhkitan.
  - na. Krama Banjar utawi Desa sayaga nedunin manut pararem Selanturnia ngromba ngaryanin eteh-ete sawa manut dresta, malarapan pamargi krama suka, tan nganggen patedunan.

- ca. Prade sang lampus ngararis pacang kaabenang ring Desa Adat Tusan patut :  
Krama banjar utawi desa ngamedalin patus, nganter, ngromba upakara lan  
upacara ke setra jantos puput.

#### Pawos 51

Tata trepti rikalaning nganter layon ke setra :

- ha. Krama sane nganter layon ka setra tan dados ngarihinin layon utawi sawa, sajawaning  
ngamong upakara.
- na. Pamargine mangda alon trepti, tan wenang ngarap utawi mawig-wigan, napi malih  
ngarusak sawa, miwah sahanan upakarania.
- ca. Krama sane nganter patut mabusana adat.
- ra. Sasampune rawuh ring setra utawi tunon, tan dados matinggal sadurunge wenten  
atur piuning saking prajuru.
- ka. Sang mamurug keni pamidanda manut pararem.

#### Pawos 52

Tata cara ngangge Setra kemanggehang sekadi ring sor :

- ha. Sang pacang ngangge setra patut nunas wak-wakan prajuru desa
- na. Tata carane ngangge setra manut kadi dresta miwah pituduh prajuru desa.
- ca. Tan kalugraha makarya gagumuk antuk babetonan.
- ra. Yan pacang ngagah layon ring setra patut katur supeksa ring prajuru desa patut  
nganutin panugrahan Ida Sulinggih utawi Ida Padanda.
- ka. Warga desa sami mangda nitenin sahananing leteh setrane mangda tan jantos ngelalah  
utawi kabakta budal ke desa pakraman utawi Kahyangan Sejabaning anggen tamba.
- da. Tan wenang ngagah sawa yan tan ngaben masa ring desa Tusan.
- ta. Sang mamurug uger-uger inucap keni pamidanda manut pararem.

Patus wenten kalih soroh luire :

1. Patus Masa :
  - ha. Krama desa adat utawi banjar medal patus manut pararem.
  - na. Krama desa adat utawi banjar nyanggra karya manut pararem
  - ca. Yening sang ngarepang atiwa-tiwa lintangan ring asiki patus punika patut kaepah manut sang ngarepang.
  - ra. Patus masa kamargiang satunggil ngaben masa.
  - ka. Ngaben masa kamargiang satunggil 2 warsa.
  - da. Krama polih panguing ajengan manut pararem.
2. Patus dadakan utawi mendem.
  - ha. Krama desa adat utawi banjar medal patus manut pararem
  - na. Krama desa adat utawi banjar nyanggra pakaryan sang kelampusan manut pararem.
  - ca. Tan ngamolihang pamatut ajengan.
3. Pamargin patus ring ajeng kaenter antuk prajuru banjar utawi kelian patus ring soang-soang banjar.
4. Tan kapatutang sang atiwa-tiwa nuduk pakenan-kenan patus.
5. Prade wenten sinalih tunggil krama wiadin warga Desa Adat Tusan malebonan sawania ring luar Desa Adat Tusan tan kapatutan nuduk patus, nanging banjar utawi desa tan wenang mialangin pemargi inucap yan tan piwal ring uger-uger tiosan.

- (1) Mungguing tatuek sane kabawos Cuntaka muwang Sebel kasinahang sakadi ring sor :
  - ha. Kawentenan tan suci ring manusa, malarapan antuk madrebe warga wawu seda utawi nyambutang karya Pitra Yadnya kabawos cuntaka.
  - na. Kawentenan tan suci ring manusa sane malarapan antuk kawentenan siosan kasinanggah sebel, makadin ipun :

1. Sangkaning ngaraja suwala,
2. Sangkaning ngembasang oka wyadin karuron,
3. Sangkaning pawiwahan sadurung mabiakala,
4. Sangkaning malaksana gamia gamana,
5. Sangkaning malaksana salah timpal,
6. Sangkaning ngembasang oka tan malarapan antuk pawiwahan,
7. Sangkaning malaksana lokika sanggraha,
8. Sangkaning malaksana Sad Atatayi,
9. Sangkaning katiben sungkan buduh.

(2) Sengker cuntaka kamanggehang sakadi ring sor :

ha. Cuntaka kalayusekaran kabinayang sakadi ring sor :

1. Yan sang seda punika warga sane sampun maketus untu, cuntaka kulawargania sapakarangan utawi sapeembasan jantos 11 rahina utawi manut drestania soang-soang.
2. Yan sang seda punika rare durung ketus untu, cuntaka kulawargania 9 rahina.
3. Yan rare durung kepus udel sane seda, cuntaka yayah renania 42 rahina.
4. Yan sang seda raris pacang kaplebonang kulawargan sang seda ngambil cuntaka ngawit seda jantos wusan mapapegat.
5. Yan palebonnia majalaran antuk ngagah, cuntakania ngawit ngulapin jantos mapapegat.

na. Yan rikala nyambutang karya Dewa Yadnya ring Pura Desa wenten sinalih tunggil warga desa sed .sane kapatutang keni cuntaka wantah sang ngarepin kemawon utawi kabawos sebel karang.

(3) Mungguwing sengker sasebelan kamanggehang sakadi ring sor :

ha. Sangkaning ngeraja suwala, saking ngawit ngaraja suwala jantos mabersih.

na. Sangkaning ngembasang oka wyadin karuron sebel lanang istri 42 rahina.

- ca. Sangkaning Ngembasang oka tan majalaran pawiwahan, sebel sang renania jantos 42 rahina tur patut maduluran pamrayascita raga sakabuatan Nanging rarenia, manggeh kasinanggeh sebel jantos wenten sane meras.
- ra. Sangkaning Pawiwahan, jantos sang kalih ngamargiang upacara pakala-kalaan kasaksiang olih prajuru desa.
- ka. Sangkaning malaksana gamia gamana, kasebelania jantos sang melaksana kepalasang tur kawentenang pamrayascita manut pararem.
- da. Sangkaning Salah timpal, sebelnia jantos kamargiang upacara pamrayascita manut sastra agama.
- ta. Sangkaning mobot tan paupacara pawiwahan utawi lokika sanggraha, sebelnia jantos prasida ngawentenang upacara pabiyakawonan.
- sa. Sangkaning malaksana Sad Atatayi, sebelnia jantos Ngamargiang pamrayascita raga, nanging sang asaj inika salawasnia tan kadadosang madwijati utawi kaadegang dados pamangku.
- wa. Sangkaning katiben sungkan buduh, sebelnia jantos sang sungkan prasiddha mawali waras saha marayascita raga manut sastra agama.

#### Palet 4

### Indik Manusa Yadnya

#### Pawos 55

- (1) Manusa Yadnya inggih punika, sahananing upacara dharmaning kauripan manusa, ngawit saking patemoning kama bang kalawan kama petak sajeroning garba ngantos selamania maurip.
- (2) Upacara sekadi ring ajeng dudonania sekadi ring sor :
  - ha. Magedong-gedongan.
  - na. Rare wawu embas.
  - ca. Kepus pungsed.
  - ra. Tutug kambuhan.

- ka. Tigang sasih.
  - da. Otonan utawi odalan.
  - ta. Mapetik rambut.
  - sa. Makupak utawi maketus gigi.
  - wa. Tutug kelih utawi ngaraja sewala sane istri, ngembakin suara sane lanang,
  - la. Metatah utawi mepandes.
  - ma. Mawiwaha.
  - ga. Mawinten.
  - ba. Madwijati.
- (3) Upacara inucap ring ajeng nganuting kecaping agama, kamargiang nista, madya lan utama, tur nganutin dresta miwah sima ring desa adat.

#### Palet 5

#### Indik Bhuta Yadnya

#### Pawos 56

- (1) Bhuta Yadnya inggih punika, upacara-upacara marupa : biakala, caru, labaan, aci lan pakelem sane siosan.
- (2) Biakala ring pertiwi, kahyangan lan babhutan kawastanin caru.
- (3) Upacara ring sarwa prani luwire :
  - ha. Upacara ring tumuwuh nemonin rahina Saniscara Kliwon wuku Wariga kawastanin Tumpek Pangatag.
  - na. Upacara sarwa ring ingon-ingon nemonin Saniscara Kliwon wuku Uye kawastanin Tumpek Kandang.
  - ca. Upacara pakala-kalaan manusa manut wigunania ketah kabawos pabyakalaan.

- (4) Pacaruan inucap ring ajeng nista, madya utama manut wiguna kadi ring sor :
- ha. Eka Sata.
  - na. Panca Sata.
  - ca. Panca Sanak.
  - ra. Panca Kelud.
  - ka. Rsi Gana
  - da. Balik Sumpah.
  - ta. Melabuh Gentuh.
- (5) Sajawaning kadi ring ajeng, kawentenan upacara :
- ha. Yadnya sesa, nyabran rahina ritatkala wusan maratengan.
  - na. Masapuh-sapuh rikala pacang puja wali ring Kahyangan desa.
- (6) Upacara inucap ring ajeng kalaksanayang manut tetujonnia.

#### Pawos 57

- (1) Ngangken ngawarsa rikalaning sasih Kasanga, Desa Adat Tusan ngamargiang dudonan upacara sekadi ring sor :
- ha. Makiis kasegara manut piteket saking Parisada,
  - na. Rawuh saking makiis Ida Bhatar Nyejer ring Pura Melanting jantos puput ngamargiang pacaruan tilem ka sanga.
  - ca. Nunas tirta mwang ajengan tawur ring Kecamatan, kalaksanayang olih prajuru desa, raris katiwakang ring krama sami;
  - ra. Ngawentenang pacaruan ring desa, ring Kahyangan mwang ring karang paumahan manut dresta.
  - ka. Ngalaksanayang pangrupukan mabuwu-buwu kaenter olih prajuru desa.
- (2) Ring rahina penyepian, krama desa patut Ngamargiang Catur Berata Panyepian sekadi :
- ha. Amati Geni : tan kengin maapi-api.
  - na. Amati Karya : tan kengin nyambut karya.
  - ca. Amati Lalanguan : tan kengin maoneng-onengan masuara gora lan nyuarayang sapanunggilania.

ra. Amati Lalungan : tan kengin malelungan wiadin medal saking karang paumahan.

- (3) Paberataan inucap kamargiang saking semeng ngantos ngedas lemah benjangnyane katuntun olih prajuru desa utawi sang kasudi, tur pangawitnia kacihnayang antuk suaran kulkul.
- (4) Sang mamurug kecap ring ajeng keni pamidanda manut pararem, sajawaning polih panugrahan manut wiguna lan pakobetania kacihnayang antuk lingga tangan prajuru.
- (5) Rahina benjangnyane semeng ngembak merata panyepian utawi ngembak geni, macihna antuk suaran kulkul.
- (6) Ring rahina ngembak geni, mapiteges panglukaran brata semadi, krama desa patut ngawentenang Dharma Shanti, katuntun antuk Prajuru Desa maka cihna pangawit dewasa Icaka Warsa.

## PANCAMA SARGAH SUKERTA TATA PAWONGAN

Palet 1

### Indik Pawiwahan

Pawos 58

- (1) Pawiwahan inggih punika, patemoning purusa kalawan pradana utawi lanang-istri malarapan panunggalan kayun suka-cita, kadulurin upasaksi sakala lan niskala.
- (2) Pidabdab pawiwahan ring Desa Adat Tusan :  
Desa Adat Tusan ngamanggehang pamargi "Purusa" teges ipun sang Pradana sane patut kaparabiang utawi kapumahang ring Sang Purusa.
- (3) Pamargin pawiwahan kaepah dados tigang palih, luire :  
ha. Papadikan kamanggala antuk pangidihan utawi pasewakan.  
na. Ngarorod marangkat rihin wawu kakrunayang.

- ca. Nyeburin utawi nyentana, sang lanang kaparabiang antuk sang wadon sane kamanggehang purusa.
- (4) Gaguat sang pacang mawiwaha sakadi ring sor :
- ha. Sampun kasinanggeh daha utawi taruna.
- na. Sangkaning sami suka cita tur pada lila tan kaparikosa.
- ca. Nganutin kecaping agama, tur manut ring undang-undang Perkawinan.
- ra. Kamargiang sudi wadhani, prade ngambil istri tios agama.

#### Pawos 59

- (1) Pawiwahan sane kapatutang utawi kasinanggeh sah ring Desa Adat Tusan sakadi ring sor :
- ha. Sampun nganutin pidabdab pawiwahan desa adat kadi ring ajeng.
- na. Sampun kamargiang pabeyakalan, utawi widhi widana tur kasaksiang olih prajuru adat lan guru wisesa.
- ca. Sampun kailikitayang ring banjar lan desa adat miwah ring guru wisesa.
- (2) Pawiwahan sane tan manut sakadi kecap ring ajeng kabawos tan sah.

#### Pawos 60

- (1) Tata cara pamargin pawiwahan sane kamanggehang ring wawidangan Desa Adat Tusan sakadi ring sor :
- ha. Pawiwahan papadikan pamarginnia madudonan kadi ring sor :
1. Pasewakan saking kulawarga purusa majeng ring kulawargan sang wadon maduluran sadana pacanangan sajangkepnia mwanng lanjaran.
  2. Pangambilan manut subha dewasa maduluran banten pejati, canang pangrawos, saha kasaksinin olih prajuru adat mwanng Dinas saking sang lanang miwah sang wadon tur kasinahang antuk suaran kulkul.

3. Pangunyaan utawi majauman maduluran banten pejati, ketipat bantal mwang saruntutania, kalaksanayang riwus ngamargiang pawidhi widanaan utawi manut paigum kulawargan sang lanang miwah sang wadon.

na. Pawiwahan ngarangkat utawi ngarorod, madudonan sakadi ring sor :

1. Sang Purusa masadok utawi mapajati ring kulawargan sang wadon antuk duta sanistania kalih diri tan kasepan ring awengi.
2. Sang Purusa ngawentenang panglukuaan utawi mapelaku ring kulawargan sang wadon jantos pastika polih pamuput, tur kasinahang antuk suaran kulkul.
3. Pangunyan utawi majauman ka umah sang wadon, patut pamupute sami rahayu tur kalaksanayang manut paigum kulawargan sang marangkat.

ca. Pawiwahan nyeburin, dudonania pateh sakadi pamargin papadikan, sakewanten dudonan punika kamargiang olih kulawargan sang wadon sane kaadegang purusa sane kabawos santana rajeg.

- (2) Prade wenten warga desa ngambil rabi jantos nrebak wangsa, kangkat pasadokania karawuhang ring prajuru desa adat utawi Dinas, saha pinunas mangda ngrawuhang ring kulawargan sang wadon maduluran rerepi sane kalinggatanganin olih sang marangkat mwang prajuru adat wyadin Dinas pinaka saksi.
- (3) Sahananing pawiwahan warga Desa Adat Tusan patut mangda kajangkepin antuk Tri Upasaksi tur kapuput olih Ida Sulinggih utawi Ida Padanda utawi Pinandita manut Dresta, salanturnia kailikitayang ring Desa Adat miwah ring Guru Wisesa manut Undang-undang Perkawinan.
- (4) Prade ngambil rabi jadmā sios agama patut kamanggala antuk upacara Sudhi Wadhani manut tuntunan saking Parisadha, kasaksiang olih prajuru desa adat.
- (5) Pinaka pamuput babawosan Upasaksi ring Desa Adat, patut kulawarga sang purusa nawur dana pangilikitayan gung artha manut pararem.

### Pawos 61

Prade wenten sinalih tunggil krama desa madrebe oka deha mobot, pamargine kamanggehang sakadi ring sor :

- ha. Kapuputang malarapan paraş paros olih kulawargan sang wadon majeng ring kulawargan lanang.
- na. Prade pamargin inucap tan prasida polih pamuput, patut kulawargan sang wadon nyadokang Indik punika ring prajuru desa tur nunas pamargi;
- ca. Risampune polih pasadok, prajuru desa patut digelis mawosin wicara inucap, unteng tatujone mangda sang malaksana prasidha kajangkepang alaki rabi.
- ra. Prade usaha saking prajuru tan prasida mapikolih, patut wicarania katur ring Guru Wisesa.
- ka. Prade panepas saking Guru Wisesa untengipun pateh ring panepas prajuru Desa Adat tur sang kalih prasidha ninutin, prajuru wenang niwakang pamidanda ring sang kasinahang piwal ring panepas prajuru, agung alit pamidandania manut pararem.
- da. Prade penepas saking Guru Wisesa taler tan prasidha matemuang sang kalih alaki rabi, wenang sang kasinanggeh sisip olih Guru Wisesa katiwakin pamidanda arta manut pararem.
- ta. Prade sang lanang mawiwit saking dura desa, sahanan pamidanda utawi pamrayascita patut katiwakang ring sang wadon.

### Pawos 62

Prade sinalih tunggil krama utawi warga desa malaksana dratikrama, gamia gamana wyadin salah timpal, wenang kabawosin olih prajuru saha katiwakin pamidanda arta wyadin pamarisudha manut pararem, utawi katur ring Guru Wisesa.

### Palet 2

### Indik Nyapian

### Pawos 63

Indik palas marabian kasinahang sakadi ring sor :

1. Palas marabian sangkaning sinalih tunggil lampus kabawos balu.
2. Palas marabian sangkaning tan prasida adung malih alaki rabi kabawos nyapihan.

#### Pawos 64

- (1) Yening riwekas sang pecak nyapian malih adung alaki rabi, patut mawiwaha malih manut Pawos 60 tur patut nawur pamidanda ring Desa Adat manut pararem.
- (2) Yening wenten sinalih tunggil amandäl sanggama jantos enem sasih, risampune wenten pasadok, prajuru maritetes tur midabdabin ngarerehang pamargi mangda pastika jangkep utawi palas.
- (3) Prade tan manut sajeroning asasih, wenang sang amandal keni pamidanda manut pararem.

#### Pawos 65

- (1) Balu luh sane katinggal lampus olih lakinia utawi balu sane pecak nyeburin, patut ngamargiang swadharma kadi ring sor :
  - ha. Ngamanggehang patibrata.
  - na. Ngamanggehang sahanan ayahan krama manut ayah sang balu.
  - ca. Ngeraksa ngutsahayang tur miara sahanan warisan sentanania.
  - ra. Tan kapatutan ngadol utawi makidiang warisan, sajawaning polih uwak-uwakan saking pakulawargan rabine saking kapurusa.
- (2) Balu sane tan pageh ring swadarmaning balu, luire :
  - ha. Matingkah drati krama.
  - na. Matilar tan pasadok langkung ring enem sasih.
  - ca. Lempas ring kapatibrataan, lan swadarmaning balu sane siosan.
- (3) Balu sane kasinanggeh tan pageh ring swadarmaning balu kadi inucap ring ajeng, prade mabukti wenang katundung olih warga purusa, saha tan polih pah-pahan warisan.
- (4) Prade balu tan pasentana pageh ring swadarmaning balu, prade katundung olih warga purusa polih pah-pahan pagunakaya lan waris.

Palet 3

**Indik Sentana**

Pawos 66

- (1) Sentana wenten kalih soroh, inggih punika :
  - ha. Pratisentana, inggih punika sentana sane metu saking pawiwahan sane sampun sah.
  - na. Sentana paperasan, inggih punika sentana sane kamolihang malarapan antuk upacara pamerasan.
- (2) Sentana rajeg, inggih punika pratisentana wadon sane kamanggehang purusa dwaning ngalaksanayang pawiwahan kaceburin.

Pawos 67

- (1) Meras sentana patut kacihnayang antuk upacara mwang artha berana pamerasan, tur kasaksinin olih prajuru Desa Adat mwang Dinas sane wenang ngilikitayang sapatutnia.
- (2) Sapasira ugi pacang meras sentana patut masadok ring prajuru Desa Adat sanistania tigang (3) sasih sadurung pamerasan.
- (3) Prajuru Desa patut digelis nambyakang ring wawidangan Desa Adat.
- (4) Sang Rumasa tan lila, mangda nyadokang ring prajuru Desa masengker asasih sadurung pamerasan kamargiang.
- (5) Prajuru Desa digelis maosin utawi ngicenin pamutus nepek ring catur dresta, awig-awig mwang pararem Desa Adat.
- (6) Prade sulus pamerasan tan manut kecap ring ajeng prajuru desa wenang ngandeg sang pacang meras saha ngicenin pamutus, mangda kapuputang riin bebawosan sulus utawi wicarania, Yening tan prasida putus babawose irika wawu katunasang pamutus ring Guru Wisesa.

Pawos 68

- (1) Sane patut kaperas pinaka santana madudonan sakadi ring sor :
  - ha. Papernahan nedunang saking sang pacang meras.

- na. Saking waris pancer kapurusa.
  - ca. Mawiwit saking sinalih tunggil kula warga tunggal sanggah, paibon, lan dadia.
  - ra. Mawiwit saking pancer kula warga wadon.
  - ka. Prade tan wenten saking dudonan kecaping ajeng, wenang ngalimbakang ring maha gotrania utawi pasametonania ring dura desa.
- (2) Tan dados ngencak patus.

#### Palet 4

### Indik Warisan

#### Pawos 69

- (1) Warisan inggih punika tetamian arta berana saha ayah-ayahan ngupadi kasukertan sakala niskala saking kaluhurania arep ring turunania.
- (2) Sane kaucap warisan luire :
  - ha. Druwe tengah, karang paumahan, pamerajan utawi sanggah.
  - na. Paguna kaya, tataladan, jiwa dana lan utang piutang.
  - ca. Ayah-ayahan ring banjar lan Desa Adat.
- (3) Wawu, kengin kabawos warisan prade :
  - ha. Wenten sang mapiturun sane kabawos pawaris.
  - na. Wenten katurunania sane kabawos waris utawi ahli waris.
  - ca. Wenten arta berana miwah tategenan, ayah-ayahan sane kabawos warisan.
- (4) Sane kabawos waris :
  - ha. Pratisentana purusa.
  - na. Pratisentana wadon sane kaadegang dados santana rajeg.
  - ca. Sentana paperasan lanang utawi wadon.

(5) Prade tan wenten sakadi ring ajeng sane kasinanggeh waris :

- ha. Papernahan pancer kapurusa ngunggahang luire : rerama, rerama dimisan, rerama ring mindon lan salanturnia.
- na. Papernahan pancer kapurusa kasamping luire : misan, midon lan salanturnia.
- ca. Papernahan pancer kapurusa nedunang luire : keponakan, keponakan ring misan, keponakan ring mindon lan selanturnia.

#### Pawos 70

Swadarmaning ahli waris patut :

- ha. Nerima saha nguasayang tatamian pahan kaluhurnia, makadi ngarempon sanggah, pura saha pangupakarania miwah ayah-ayahan pawaris.
- na. Ngabenang Sang Kawaris saha ngalanturang upacara-upacara pitra yadnya salanturnia.
- ca. Naurin utang-utang pawaris manut pangelokika.

#### Pawos 71

Pangepahan waris manut sakadi ring sor :

- ha. Risampun kalaksanayang Pitra Yadnya lan utang-utang pawaris buntas katawur.
- na. Para ahli waris polih pah-pahan pada sangkaning pagunakaya, sajaba karang utawi tegal ayahan desa patut kaamong antuk ahli waris sang sinanggeh krama ngarep.
- ca. Sinalih tunggil ahli waris kengin tan polih pahan prade :
  - 1. Nilar kawitan, sasananing agama.
  - 2. Alpaka Guru Rupaka.
  - 3. Sentana Rajeg kesah mawiwaha utawi pratisentana kesah nyeburin soang-soang kabawos ninggal kedaton.
- ra. Boya ahli waris, kengin muponin upon-upon manut dudonan luire : balu luh wiadin muani wiwit nyeburin.

- ka. Pewaris kengin mapeweweh rikala kantun maurip, maka cihna paweweh teleb, ring pianak sane kesah mawiwaha.
- da. Prade sajeroning pakulawargan wenten ahli waris langkungan ring adiri, patut :
  1. Kawentenang paiguman indik paedum waris inucap.
  2. Yening tan prasida, katunasang pamatut ring prajuru.
  3. Prade taler tan katérima ring panepas prajuru, kengin nunasang pamutus ring Guru Wisesa.
- ta. Prade wenten karang ceput wenang prajuru utawi Kerta Desa mawosin nureksa silah-silah saha niwakang pamatra manut dudonan ring :
  1. Sang patut ngawaris saking purusa.
  2. Papernahan kesamping yening tan wenten papernahan ngunggahang.
  3. Yening tan wenten sakadi inucap ring ajeng minakadi 1 lan 2 karang inucap kasukserahang ring Desa.

## SADHAS SARGAH WICARA LAN PAMIDANDA

Palet 1

Indik Wicara

Pawos 72

- (1) Sane wenang maosin utawi mutusang wicara ring Desa Adat inggih punika sane kasinanggeh Kerta Desa, Prajuru Adat lan Banjar madudonan sakadi ring sor :
  - ha. Prade sang mawicara maka kalih tunggil banjar, wenang kabawosin dumun olih Kelihan Banjar.
  - na. Prade sang mawicara masiosan Banjar nanging kantun wawidangan Desa Adat Tusan, wenang wicarania pinih riin kabawosin olih Bendesa Adat Tusan.
- (2) Tata dudonan maosin saha muputang wicara warga desa, kadi ring sor :
  - ha. Kaping ajeng kabaosin antuk Kelihan Banjar.

- na. Paruman banjar tan kaanutin, kengin nunasang ring Bendesa Adat.
- ca. Bendesa adat tan prasida muputang, katincapang ring panglingsir sane kasinanggeh Kertha Desa.
- ra. Prade taler pamatut panglingsir desa tan kacumponin, katunasang ring paruman desa, kasinanggeh wasananing pamutus ring desa.
- ka. Yening wicara punika tan prasida molihang pamutus ring desa adat, sang mawicara kengin nunasang pamutus ring Guru Wisesa.

#### Pawos 73

- (1) Sahananing wicara sane mawiwit saking laksana corah saluir sane kasinanggeh nungkasin daging awig-awig utawi pasuara miwah pararem desa, Prajuru Desa patut digelis maosin tan nyantos pasadok tur nibakang pamidanda manut pararem.
- (2) Sewosan ring wicara kadi kocap ring ajeng prajuru patut nyantosang pasadok saking sang nunas bawos.
- (3) Panepas prajuru patut pastika nyantenang iwang patut malarapan antuk Catur Dresta, muwah tan maren nepek ring Tri Pramana.

#### Palet 2

#### Indik Pamidanda

#### Pawos 74

- (1) Desa utawi Banjar wenang niwakang pamidanda ring warga desa utawi banjar sane kabawos sisip.
- (2) Sahanan patiwak pamidanda kamargiang olih Bendesa Adat muang Kelihan Banjar.
- (3) Bacakan pamidanda luire :
  - ha. Ayah-ayahan panukun kasisipan.

- na. Danda arta, dadosan minakadi dosa saha panikel-panikelnia utawi panikel urunan.
  - ca. Rarampagan.
  - ra. Panyanggaskara
  - ka. Kasepekang
  - da. Kawusanang makrama
  - ta. Pamidanda sewosan manut pararem.
- (4) Ageng alit pamidanda sane katiwakang patut masor singgih manut ring kasisipania, tur kaputusang ring paruman Banjar utawi Paruman Desa.
- (5) Sahanan jinah utawi artha brana mawit saking pamidanda patut ngaranjing dados druwen Banjar utawi druwen Desa manut kawentenania.

#### Pawos 75

- (1) Yan wenten krama mutang ring Banjar utawi ring Desa mawiwit antuk dadosan, paturunan lan pamidanda, yan wenten bawos patanggeh ring ajeng paruman desa utawi banjar polih sengker asasih. Yan sampun manut sengker nenten naur wenang ketikelang. Yening nikel taler nenten naur sajeroning asasih wenang karampag olih Prajuru kasarengin antuk krama Banjar utawi Desa manut kabuatania.
- (2) Tata cara ngalaksanayang rarampagan sakadi ring sor :
- ha. Kamanggala antuk piteket saking prajuru marep ring sang pacang karampag.
  - na. Pamargin rarampagan kalaksanayang olih prajuru kasarengin antuk krama banjar utawi desa saha pecalang desa, Pinih akeh 11 diri pinaka saksi mwang pangrombo.
  - ca. Sang ngarampag mangda sangkaning darsana, ngambil rarampagan utawi nyawenin barang utawi tanem tuwuh lan wawalungan manut ring hutang sang karampag.
  - ra. Rarampagan kaunggahang ring ilikita tur kasaksiang olih prajuru Banjar utawi Desa.

- ka. Prajuru patut miteketin sang karampag mangda digelis nebas druwenia sadurung lintang ring awuku. Yening rarampagan jantos kutus rahina durung katebas kangkat keadol utawi kalelang.
- da. jinah lelang barangnia kaanggen naur utangnyane ring Banjar utawi Desa, tur sisania kawaliang ring sang karampag.
- ta. Tan kapatutang utawi kawenangan ngarampag saluwiring barang sane patut kasuciang manut agama, miwah mademang pangupajiwan sang karampag.

#### Pawos 76

- (1) Prade sang karampag ngawara utawi mialangin pamargin pangerampag inucap ring ajeng, punika kasinanggeh tan nganutin daging awig-awig, lan lempas ring swadharmaning krama. Jadma punika wenang kasepekang ring Banjar utawi Desa.
- (2) Samalih yan purun taler mialangin pamargi kadi ring ajeng makudang-kudang sangkepan, kaicen pakeling, tan wenten pamargi sajawaning kawusanang makrama Banjar utawi Desa tur tan kedadosang ngangge sahananing sarana sane kadruwe antuk Banjar utawi Desa.
- (3) Pamidanda sisip sakadi ring ajeng praside purna buntas, yan sang sisip sampun :
  - ha. Nunas geng rena sinampura sajeroning paruman banjar utawi desa riantukan purun nguwak pasubayan wiadin pasuara ring paruman.
  - na. Nawur pamidanda panguwak, pasubaya duk pacang karampag kadulurin banten pras pejati lan prayascita.

#### Pawos 77

- (1) Sadurung pamatut desa pacang niwakang lad ring krama, pinih riin prajuru desa patut mituturin miwah midabdabin sang pacang kaelad mangdene prasida tan durus kaeladang makrama.
- (2) Yan sampun ngantos tigang sangkepan prajuru desa mapitatur miwah midabdabin, taler tan katinutin daging pitutur prajuru desane, sapisanan rikala punika kaeladang makrama.

- (3) Bebacakan sane dados kaeladang makrama banjar utawi makrama desa, minakadi krama sane tan nganutin pamargi sakadi ring sor puniki.
- ha. Tan nawur hutang saha panikelnia ring banjar utawi ring desa manut sengker.
- na. Tan nganutin daging awig-awig puniki.
- ca. Tan nganutin pamutus paruman krama banjar utawi paruman desa.
- (4) Tatiwak salantur nia marep ring jadma sane kaeladang sakadi ring sor :
- ha. Sang kaeladang makrama, tan polih pah-pahan saduwen-duwen banjar utawi desa.
- na. Yan rikala kalampusan tan kalugra mendem ring setra adat Tusan nanging kadadosan ngeseng sawa ugi malarapan naur pananjung batu manut pararem. Pecaruan ring setra kalaksanayang antuk desa.
- ca. Rikalaning sang lad madruwe karya yadnya, tan wenang nganggen druwen banjar utawi desa.
- ra. Sang sampun kaeladan tan wenang ngaranjing ka Pura Kahyangan Tiga lan Pura siosan druwen Desa Adat.
- (5) Riwekas prade sang lad pacang malih ngaranjing makrama banjar utawi makrama desa, punika manut pamutus paruman krama banjar utawi desa.

### SAPTAMA SARGAH NGUWAH-NGUWUHIN AWIG-AWIG

Pawos 78

- (1) Nguwah-nguwuhin awig-awig puniki patut kalaksanayang antuk paruman krama Desa Adat.
- (2) Wiwit paruman Indik nguwah-nguwuhin awig-awig ring ajeng kengin kamedalang antuk krama niri-niri. Kelihan Banjar, Prajuru Adat utawi Bandesa Adat.

Pawos 79

- (1) Pamutus babawos prasida puput, yan sampun krama lan prajuru gilik saguluk utawi kengin majalaran wawilangan suara.

- (2) Yan majalaran wawilangan suara, geguatnia sakadi ring sor :
- ha. Krama Desa sami tedun parum sanistania kalih pah tiga utawi  $\frac{2}{3}$  saking akweh krama desa adat.
  - na. Pawilangan sane nganutin, sanistania apah kalih langkung adiri saking akweh krama sane sareng parum.
- (3) Sakaluring paimana sane wenten sadurung awig-awig puniki kakukuhang patut mangda kaanutang ring daging awig-awig puniki.
- (4) Sakaluring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem pararem.

### ASTAMA SARGAH SAMAPTA

Pawos 80

- (1) Awig-awig puniki kawastanin Awig-Awig Desa Adat Tusan.
- (2) Awig-Awig puniki kamargiang ngawit saking kararemintur kamanggehang antuk Krama Desa Adat Tusan.
- (3) Awig-Awig Desa Adat Tusan puniki nganinin sahananing warga lan Krama Desa Adat miwah sahananing sane kakuwub antuk Desa Adat.

Pawos 81

- 1. Awig-awig puniki kasungkemin sajeroning paruman Desa Adat Tusan nemonin rahina Buda Wage Langkir, titi panglong ping 15 Sasih Kalima Isaka 1924, Tanggal Masehi 4 Desember 2002.
- 2. Awig-awig puniki kalingga tanganin olih Bendesa Adat, para Kelihan Banjar saha kasaksin olih para Kepala Dusun sawawengkon Desa Adat Tusan, Kepala Desa Tusan, Camat Banjarangkan, tur kakukuhang olih Bupati Klungkung maka murdaning pamikukuh.

3. Lwir sang ngalingga tanganin  
ha. Prajuru Desa Adat Tusan :

1. Bendesa Adat Tusan,



I Wayan Tumbuh.

2. Kelihan Banjar Tusan Kaler,



I Wayan Kasta.

3. Kelihan Banjar Tusan Kangin,



I Dewa Nyoman Putra.

4. Kelihan Banjar Tusan Kawan,



I Dewa Made Puspa

na. Kaping kalih Prajuru Desa Dinas maka saksi :

1. Kepala Dusun Kalee,

  
I Nyoman Subrata

2. Kepala Dusun Kangin,

  
I Nyoman Mudiara.

3. Kepala Dusun Kawan,

  
I Dewa Putu Jambe.

5. Camat Banjarangkan

  
I Ketut Alit Arta Sedana, SIF.

4. Kepala Desa Tusan,

  
Ida Bagus Puri Raka.

ca. Bupati Klungkung maka murdaning pamikukuh


Telah dicatatkan

Reg. Nomor :

Tanggal :

Mengetahui

Bupati Klungkung,

  
Tjokorda Gde Ngurah.

## TIM PENYURAT AWIG-AWIG DESA ADAT TUSAN

|                   |                                                                                                                                                                                                                                                                                                                                                                                                                                                                                                       |
|-------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| Ketua             | : Dewa Made Rai                                                                                                                                                                                                                                                                                                                                                                                                                                                                                       |
| Wakil Ketua       | : Dewa Ketut Arep, Spd.                                                                                                                                                                                                                                                                                                                                                                                                                                                                               |
| Sekretaris        | : Drs. I Nyoman Sucitra.                                                                                                                                                                                                                                                                                                                                                                                                                                                                              |
| Wakil Sekretaris  | : I Made Sudarma                                                                                                                                                                                                                                                                                                                                                                                                                                                                                      |
| Bendahara         | : Dewa Gede Rai, BA.                                                                                                                                                                                                                                                                                                                                                                                                                                                                                  |
| Pembantu-Pembantu | : Dewa Putu Kompiang<br>Wayan Dara Yasa                                                                                                                                                                                                                                                                                                                                                                                                                                                               |
| Anggota-Anggota   | : <ol style="list-style-type: none"><li>1. Dewa Putu Kompiong</li><li>2. Drs. Nengah Sukari.</li><li>3. Mangku Wayan Menteg.</li><li>4. Ida Bagus Putu Raka.</li><li>5. Dewa Gede Jambe.</li><li>6. Ketut Ariyasa.</li><li>7. I Wayan Astika.</li><li>8. Dewa Putu Kerti.</li><li>9. Made Kerta.</li><li>10. Mangku Wayan Kukuh.</li><li>11. Nyoman Tedun.</li><li>12. Dewa Nyoman Mangku.</li><li>13. Ida Bagus Made Subamia.</li><li>14. I Wayan Subrata.</li><li>15. Dewa Ayu Ratnihari.</li></ol> |



Nara Sumber :

1. Dewa Putu Gede Segara
2. Ngakan Putu Kantor
3. Drs. I Wayan Tumbuh.
4. Ida Bagus Putu Gaga.
5. Jero Mangku Ketut Dara : Mangku Dalem Kayu Putih
6. Jero Mangku wayan Regeg : Mangku Dalem Anggur.
7. Jero Mangku Nyoman Sadia : Mangku Dalem Lungatad.
8. Jero Mangku Made Gubig : Mangku Pura Batur.
9. Mangku Ngakan Putu Rupug : Mangku Pura Ketakan Aji.
10. Ngakan Ketut Kari.
11. Mangku Nyoman Merta.
12. I Wayan Kawi.
13. Dewa Nyoman Putra.
14. I Wayan Kasta.
15. Dewa Made Puspa.
16. Dewa Ketut Londer.

Bendesa Adat Tusan,



Drs. I Wayan Tumbuh